

# PLAN AWAJUN INAGNAMU AL 2024



**TAJIMAT**  
**PUJUT**

SUPAYAKU, ENERO 2015

## PLAN DE VIDA DE LA COMUNIDAD NATIVA AWAJÚN DE SUPAYAKU AL 2024

### **Comunidad Nativa Awajún de Supayaku**

**Resolución 084-OAE-ORAMS-II-1977, fecha 24 de marzo de 1977**

**Distrito de Huarango, Provincia de San Ignacio, Región Cajamarca**

Papí wajuk takastatji mijan 2024 jegakuish nunú pachisa, muún Supayakunmaya aidau apu wegantujai chichasa umikbau nunú diísa takasmi tusa Huarango, San Ignacio, Cajamarca; apu batsata dushakam atupaktinme jujú papí agamunum ORFAC, Apu Cajamarca eketa nunú, yatsut GRUFIDES, FEDEPAZ, Ingeniería Sin Fronteras nuwigtu Soluciones Prácticas takau aidaujai ijuntuja umikbauwai.

### **Apu Supayakunmaya aidau:**

Sergio Katip Kasen - Apu Supayaku  
Wilmer Katip Pujupat - Apu Nuevo Kunchin  
Roman Pujupat Tiwi - Apu Suwa  
Justo Katip Unkuch - Apu Valencia  
Gricerio Jempekit Katip - Apu Saawintsa  
Pascual Jempekit Kamat - Apu Chingozales  
Jorge Jempekit Apiquei - Apu Yamakey  
Hernán Shimpukat Ugkum - Apu Datem  
Ramón Tiwi Jempekit - Apu Najem

### **Equipo técnico asesor:**

Jeremías Unkuch – Oficina Regional las Comunidades Nativas y Campesinas - Gobierno Regional de Cajamarca.  
Jorge Paredes – Subgerencia de Planificación - Gobierno Regional de Cajamarca  
Ana Leyva - FEDEPAZ  
Juan Pablo Saavedra – FEDEPAZ  
Pablo Sánchez – GRUFIDES  
Ofelia Vargas – GRUFIDES  
Laura Lucio - ISF  
Eduardo Dallo - ISF  
Benito Ramírez – Soluciones Prácticas

### **Equipo técnico de coordinación local**

Albercio Bazán Jempekit – ORFAC  
Neire Unkuch – Oficina de Enlace de Asuntos Indígenas - Municipalidad Provincial de San Ignacio

### **Equipo Técnico Consultor - Soluciones Prácticas**

Benito Ramírez Ocas  
Wilson Sagástegui Lozada  
Carlos Santiago Villavicencio  
Fernando Pesantes Gonzales  
Julián Ariza Arias  
Alejandro Angulo Bada

## Edición y Revisión de Estilo

Laura Lucio González

## Traducción al Awajún

Jeremías Unkuch Jempekit

## Diseño y Diagramación

Acosta Publicidad y Creatividad

## Grupo de Formación e Intervención para el Desarrollo Sostenible - GRUFIDES

Jr. Cruz de Piedra, 441, Cajamarca

[www.grufides.org](http://www.grufides.org)

## Asociación Catalana de Ingeniería Sin Fronteras - ESF

Jr. Cruz de Piedra, 441, Cajamarca

[www.isf.es](http://www.isf.es)

## Fundación Ecuémica para el Desarrollo y la Paz – FEDEPAZ

Av. General Garzón N° 1253 - Jesús María, Lima

[www.fedepaz.org](http://www.fedepaz.org)

## Soluciones Prácticas – Practical Action

Calle Tomás A. Edison 257 - San Isidro

<http://www.solucionespracticas.org.pe/>

## Primera Edición

Cajamarca, Perú, Agosto 2015

Hecho el Depósito Legal en la Biblioteca Nacional del Perú N° 2015-11804

Impreso en: Acosta Publicidad y Creatividad. Jr. Bolívar N°363, Cajamarca

Editado por: Asociación Catalana de Ingeniería Sin Fronteras. Jr. Cruz de Piedra, 441, Cajamarca



**Fedepaz**

Fundación Ecuémica para el Desarrollo y la Paz



Ingeniería Sin Fronteras



Agència Catalana  
de Cooperació  
al Desenvolupament

# Nagkamku augmatbau

Papí wajak takastatji mijan 2024 jegakuish nunú pachisa, muún Supayakanmaya aidau apu wegantujai chichasa umikbau nunú diisa takasmi tusa Huarango, San Ignacio, Cajamarca; apu batsata dushakam atupaktinme jujú papí agamunum ORFAC, Apu Cajamarca eketa nunú, yatsut GRUFIDES, FEDEPAZ, nuwigtu Soluciones Practicas takau aidaujai ijuntuja umikbauwai.

Nuwigtu anentaimsa takasbauwai papí najanku wajak awajuntish takakuik iina batsatkamujish emtikmainaita tusa atsa takasa wegakuik shiig takamainai 2024, juna diís juti apují pekaja dusha yaimpamain ainawai iina nugke atsumamu takamain aidau.

Jujú papí umiktasa wakegakuik waji atsumaji nunú shiig dekau asa yupichu takasbauwai awajunti atsumkasa pujustasa wakegakuich wajak takamainaitji dushakam nuwigtu jutí muúnji wakeyina nunú betek takamainai tikich aentskesh jutí wekagashbaunak jutik takasta tusag waitkagmamaitsui atsa takasa pujaku Tajimak Pujumainaitji, tuja jujú papí najanbaunmakashí aents aidau anentai apusau ainawai, dukug, apu, kakajam, pamuk jintinkagtinchakam, ampijatin, aidaujai ijuntuja takasbauwai.

Papí agakbauwai wajak takastatji nunu pachisa, itugkeakuya yupichu takamainaita jutí nugkenish dushakam nunui inibau awai ¿Yaá ainaji? ¿Wají egaji? ¿Wajak takastatji? Jujú uminkati tusaish, itugkeakuya shiig umimainaita takat emtikatasa juka papik takasbauwai 2013, 2014.

Nuwigtushkam papí iina nugke takamain augmattsa umikag juka takasa emaku iina batsatkamuji iwagmainaita nunú pachisa agagbauwai atsa takasa emaku jutí atsumamu umimainu pachis augmatui.

Jujú papí Supayaku umikbauwa juka jutí patayí aidaujai yatsut yacha yaktanu takau aidaujai ijuntusa takasbauwai.

Seé taji apu Gerencia Planeamiento takau aidau Cajamarcanmaya papí najanbaunum yaimpaku asantai.

Tikich nugkagmash wajak takainawa awajún aidau utugchak igkuakush nunú diisa betekmamtin takasbauwai, apu aiduashkam jutí wakegamu betek takamainai.

Ashí takat aidau iina nugke takastasa wakegakuik shiig papí agaja umiku amainaitji jutí aidauti wakegamu betek, takamainai ajak ajakmatin, yuwa pujustin, ajak sujuktin jutí ikamji kuitamkatin nunú pachisa takamainaitji.

Nuwigtu tsakat, dukug, apag aidauk imatikas dekainatsui papí agagbau nunak wajak takasa wegaku iina nugke atsumamu aidau shiig takamainaita nunash nunin asantai, ashí aents aidau shiig dekamtikau amainaitji, nuiwigtush egamainaitji tikich apu aidau jutí anentaimag nunin aidaujaiatuka takat emtika emaku "TAJIMAT PUJUSTASA".



# NAGKAMKU AUGMATBAU

## ¿YAA AINAJI?

Awajunti aidautik jujú aents weantu ainaji Achual, Wampis nuwigtu jivaro namak corrientes Iquitos aatu batsatui, yatsut jivaro wegantu ainaji.

Nuwigtu awajunti aidautik batsatji namak cenepa tutaya atushkam, Nieva nuwigtu, Kanus, Cajamarca, San Martin Pucallpa atsa batsatji.

Jutí nugke Supayaku tutaya duka shiig wantinkauwai apu aidaunmash antsag Naransashkam wantinkauwai, tuja yakat San Ignacio Cajamarca awish dekainawai, juti batsatbaunak.

Entsa Supayaku tutaya nunak Martín Cuestas juti nugke waka wekagu asa Quechua chichamai adaikauwai, tuja duka atus tawai. "Iwanchi Yumiji" tawai Quechua chichamnum Supa =Iwanch Yaku=Yumi tawai.

Supayaku nayúm shiig pegkeg ainuwe nunin asamtai ina muúnji timui nijami tusa chichamjutaig Supayaku antawastai tumain senchi yutinuwe nunin asamtai ayatak Supayak asutiami tusa kashikmas chichama umikag muún timu tai nijá namaka juwínawai, duwi apag Martin Cuestas atus adaikuawai tinu agmae.

### Jutish tuwiya ainaji

Duik mijan treintatin, neje ashimnatai jutí muúnji numpatkaim, Kucha weganta aátus batsamin aidau, wakega wajakui tikich nugka yamagma ejega kuntu maá yuwatatus, tujash buchig wegaju asamtai tujigka waketu wajakui ainawai.

Wemainchau atai waketki áaknu kajinamunun kajanum wantintukui makichik aents nuniak tiuwai wegam antsamek weta nunikma wainkattame chayú jinti nunú ainja jegattame tima shintag yachijai wagkag tujutni tusa suwamtin aig ashinkuawai, juní tujutmape tusa wekama wainkajui chuyú jintin nunik pataetuk jegantui dáase dasegmak akagunum, nunui wajasa antam kuntu shinak wakemai wajayi tuwajame, sake ayau asa dáase umpuam saáa wajau nuwigtu namak kamatkagtin atatman wainkag shiig aneyaja tuwajame, nunik

wemainchua asamtai numí tsupik daeka juki shiig jigkaja diipas jegawaju, nunikmá chigki, kugtin, aidauk kuashat ayau, namaka diikma nayum, najem ayua maá waketuinak yatsuju etsegkaipa tusa Tsakim yachi Puanchig atus chichas patayi aidaunash ujatsuk juga waketkiu kuashat maá yuú batsatai patayi ijak jegakma wainkua aga najempa pagage batsatu, wainak ¿yatsuju tuwi najempash maá yuwame? tama nui ujaku, dutikam wagka minash ujakshamaume wisha utusanuk nugka ejegawag tusa wekaetajama tusa diitash weaju tujash dekasek kuntu ayau nunui kaunawag juga jegamkajui, nunak adaikau ainawai Tsugki nunak namak abaujimunum tsugki wegau wainak atus adaikau ainawai, yamaikish jutí muúnjig tuke tinu agmae, yamai adaikagmayi Chingozales atí tusa nunak Martin Cuestas atus adaikau asamtai nunui batsamas kaunawajui Burgos nui batsamas nugka apachi susa ukuinak Naranjos batsamauwai nunui juwaki Supayaku batsamsau ainawai, yamai Supayaku batsatji.

Mijan 1962 wegai Martin Cuestas najanauwai makichik ayamtai Chingozales, tujash uchi imanis atsau asamtai inagkeakiajui Naranjos nunui shiig jintiamu asauwai uchi kuashat asamtai. Nunui batsamas Supayaku ayamtai najanawajui mijan 1967.

### Juti nugke

Supayaku batsatkamuk, nugka papí jigkimui 24 marzo 1977, Resolución 084-OAE-ARAMS-II 1977, nunui juwaki Huarango - San Ignacio - Cajamarca wantinkauwaitji.

Nuwigtu ina nugke papí jinkimua duka mijan 1979 wegai N° 0003-80 Resolucion 01639-79-AA-DGRA-AR, nuwigtu mijan 1995 ikam agkan asamtai papi jinkiu ainaji ikam shiig kuitamkami tusa, nuwigtu ikam wekaetai ati tusa, papí jujui agatjamui N° 626-95 (Resolucion 766-95-AG-DRA) (IBC)

Juti nugkeg shiig muúntai ijumja dekapamak awai 47,811.30 ima Supayaku nugkega nunú, juka (IBC) tawa nuwish wantinkauwai.

Supayaku batsatkamu ima muúntai tikich batsatkamuk yaig ainawai nuna dajin jujú ainawai: Yamakey, Nuevo Kunchín, Suwa, Valencia, Saawintsa, Chingozales, Najem nuwigtu Datem.

Supayaku juwaki tikiju batsatkamu jujú ainawai:

- Namaka nujinchiya atu yakat awai Ecuador.
- Tsumunmanini yakat Santa Rosa, Bellavista, Jaen, aátus awai.
- Etsa mina nuní awai Bagua Amazonas.
- Etsa akaetaiya nuní awai Chirinos San José de Lourdes nuwigtu Chinchipe atus.

## Awajunti pujutji

Awajunti pujutjig kampakum akagkamu tumainai duka jujú ainawai: Nayaimpinum pujut, etsa pujutia awishkam, nugka initke pujut, nugkui pujamu jujú kampakum augmattsag nunú wainkau asa pujutak ewaesa wainji tibauwai jutí muúnjig.

Etsa jintiauwei jega jejamka pujutan kuntin maá yutan nayaimpinu batsatu asa sukagtawai waimatan anentaimtam kakajam; chichamtim, wajiu weéta atus untsu nugka batsata nunú waimata sukagtawai ikamyawa, ajapiag wainku asa kakajam ataya tuú wajakbauwai, untsu nugka initke batsata nunú wainkau asa dekaji agak ajakmat jujú aidu dekau asa TAJIMAK BATSAMA WAJAKUI.

Ina muúnjig pujutan yacha asa uchijinash betek jintintu wajakui ikam wekaetan kuntin máa yutan, jega jegamtan, nawanjinashkam aikasag dukujig shiig jintintu wajakui, ajak ajakmatnash kuntin tsakapatnash ashi yacha ajakui.

Awajuntik shiig dekaji jutí pujutjig augmatbau aidaushkam ikam wekaesa kuntin maá yuta, jega jegamat, yawa ikam awekout, aja ajamat nampet wegantu, kanu awat, ikam numí daáji aidaunak imatiksag, jintintu wajakui, imatikamu asa yacha ajakui, tsakag nuwena ditash aikasag uchijinak jintintu wajakui.

Antsag ina dukujinak nugkui tsanimnak susauwai atus augmatbau awai nuna juki ajakbauwai. Awajun aidaulik ikamjai tuke ijutkau batsakji atsumakuik ikam wekaesa kuntin maá yuwaji, nunig asa ikamak shiig sujimaji, jutí patayiyai betekai.

Nuwigtush ikamak iina yachiyai betekai; nugka, namak, entsa wegantushkam iman asamtai tuke chichamjaji agkan pujusmi tusa awajunti ikam atsakuig iwaku pujumaitsuji.

Mapa1. Comunidad Nativas Supayaku



Fuente: Elaboracion Propia

## Awajunti chichame

Supayakunmaya aidaulik awajun chicham chichau ainaji uchi piipich nagkamnas muún aidaushkam, nuwigtush kajimatbait sui ina pujutjig muún shiig jintintuamu asa; untsu ajak sujaku wegaku Burgos nuniaskuish Rumichina jegaku apach chicham chichaji diita jutí chichame dekachu asamtai nuniaskuish apachjai igkuniaku apachi chichame chichaji, nunin asa awajunti jimag chicham dekaji.

Jutí chichameg nuwigtush jutí pujutjig kajimatbait sui namak nijamunmak dukug uyumtin aidauk nijakenig wajasag nayumnak maumait sui, nayumpi etsagawai tuidau asamtai. Antsag iina muúnji kuntinu maátatus wetatkun yawayin yuka ayujin ajakui, yawa ijagmatit tusa ijagmatitai ikam emakma yupichu kúntin pujaun main ainawai, nuwigtu kuntinu maá itashkam patayí ipaá kuntin maámu augmatak kuitamas takas umika nuwen inajuata tima nuwe shiig inajuamtai yuwak yawayin ayuju wajakui, yuwa japimas entsanum ajape wajakui atash kuntinu ukugchí ijumtai yawa shimpangkai tusa,yujumka yuwa ashimkash yukuchinum ikigma wajakui, nuwigtush jutik nayumpik painka yuwaji nuwigtush yugkuná, nuniashkuish

wegaka jiya najuamtai yujumkajai yuwaji, kitamakuish yajamash umuji nuwigtu uyai tsamau atsa umaji, untsu juti apaji nampektatus wakegakug yajamash kajiau uwag nampenawai aátsa awajuntik batsamnaitji. Tuja dukug aidauk shauka wegaja shiig patakumas kugku akachuma jíistatinish nampeak ememen wajawai.

Awajun asihmag aidau nampeakug tawasa apujus nagki takusa bakicha jigkama etse nugkuja itipka itipjua nuwe nampeju wajakui, untsu waimaktatus baikua tsaág aidau uwag ikame wee waima wajakui, tuja uchi aidaushkam shiig unuimaju amainai chagkig, suku uúm, kutag chimpui najanbau aidaun; ikam wekaesa kuntin maá yuta, dukug aidaushkam nawanjinak jintitu wajakui yawaá tsakapat, atash kuitamat, jega shiig japimka pujut pinig, ichinak najanbau yacha amainai, antsag tsanim ukuamunum wajupa ajake awa nunak dukug aiduak shiig dekainawai dukuji aátus jintintuamu asa.

### Juti pujutjig shiig antujin ainaji

Awajunti aidautik jutií muúnjish aátsa jintintuamu asa kajimattsuji jempe atsutue tusa shiig antujin ainaji, ikancham shinakuish pataá minitai tawai tusa dekau ainaji, namak nijamunmash uyumtinuk pachinkashti nayumpi etsaegkai tuinamu asa nijamunmak pachinchau ainawai. Yamai apajui chichame etsegbau asamtai aánuk antugmaitsui aágna nagkaesauk apajuiyai tuwinawai nunú tabau asamtai kajimatmain dekapeaji tujash ashí awajuntik íina pujutjin shiig dekau amainaitji.

Tuja nuwigtush iina muúnjig tunchi wawetuamtai jajai tusa iwishín pujamunum tsuwama wajakui, tikich aidau ayatak níimsatjai tusa datema uwag wainmajai tuwinawai. Nuwigtu jutií jíistamatasa wakegakuik ayamtai najanamu tsawanji jegakui jíistamin ainaji.



Fuente: Apumedia



Fuente: Apumedia

Nuwigtush jutií dukujig dekainawai jaaku tsuwamak aidaunash chayú wiyajiskam pegkejai iyash najaimamunum, kagkají kupinash baikua anujuk tsagainawai, akape uchi najaimataish tsampaunumi dukegai sukumainawai.

Kuntin maátasa wegakuik uúm juki ikam wegaji tsegsaknum tsegas aputusa kuntin maátasa tuja pishak yaijush aidauk tsegasak aputasji, nuwigtush yajag ema pishak nemakmatai juki yuwaji, nayum maátasa wakegakuish washimá nuyum juki yuwaji.

Jutií patayi aidauk takata takak wegakun ipaáma ajanash taka wajakui, numi ajakush, jega jegamkush, aja ajamkush, aikasag.

Ipaáma nunú yujumka yajamchijai ajamawai, takasa ashimak jega kauna yajamash ampinjaun umak nagtsema wajakui, tujash yamaik kuashat takat asamtai imatikag umuinatsui, duka yamaikish tuke megkaetsui ipaáma takatak.

Jaanchnak ditak najana wajaku ainawai, ujuchi kutamag itipka najana itipju wajakui, antsag nuwenash najatua atsumkas apega wajakui nuwigtush kamuch tsakata tsupik nuna saepe kuitamas juki shiig awatug bukamat awajus nuna nugku wajakui, tsetsemakush.

Tuja yamai tsawanta jui itipak wegantunak imatikas takainatsui, ayatak jíista jegatai uchi iwaimamainak nugku agmae.

Jíista jegatain tawasa atsejuk itipka itipjua ipaku usumag nuwe nampeju wajakui, untsu shijikip



yapinu apusamuk sakamchauwai. Tujash yamai tsakat aidauk nunak apujuinatsui.

Supayakunmaya muun aidauk najanin ainawai: tawasan, tampujan, pigkuin, tumug, bakich, uum uyuamunash, nagki najagbaunash, tamugku awatak, nuwe antumtikas nampe wajakui; yamaya juwik jiísta muún awa nunui iwainmmainak tawasnak apujuinawai nuniashkuish ijunbau awa nunui iwagmamji.

Jutí dukuji aidauk yacha ainawai: pinig, ichinak, yukun, wegantu najana yujumka egkegbaunum yuwaji. Jutíí apaji aidauk yacha ainawai kanu najantanmash, papagmatnash egkemja katitai asantai.

Awajunti pujutin megkaewastai tumai dekaepeaji yamai uchi tsakat aidau apachi nawanjijai nuwenainak iina pujutjin imatikas takainatsui juka ima senchi wainji yatsut Naranjos batsata awi, apaji puyatjus jintinchamu asa, kuashat tsawan wegakug imatiksa takashmak chichamnash megkaemai ainawai.

Dukug aidaukyacha ainawai chagkig najantanash iman asa chimpia jumai atsutaish chagkina najana yujumka chimpia itawai, chagkinumak paámpa shaá idauk weganta nunu chimpiaji untsu suku mamayak chimpiatnu najanui.

Untsu tukup wegantu najanji Kamis egkea jukimi tusa muuntak wampachi najana atushat wegakush atsumkas wekaga wajakui yamaish duka tsakat aidautish kajimattsuji.

Awajunti jiístanum wegakuik shiig dakunkut ashinin ainaji juti dukujishkam shiig iwagmag kugku akachuma ipaku usumag shauka pega nampeak enemien iwainmainawai uchi nuwauch papí aujin aidauch juti pujutjinak shiig eme anentus unuimainawai, jiístatinig atsa iwainmaku tikich aidauch juti pujutji iwaintaji dukug aidauk aishmagku pachis nampejig ainawai antsag aishmagshakam nuwa pachish nampejin ainawai apag aidau nampeakug tsek, tsek tsek wegak jai, jai, jai, wajainawai awajunti jiístanumkuik shiig dakujin ainaji yajamash umaku.

Duwikish iina muúnji atsa jintintuamu asa yamaikich kajimattsuji, tujash tsakat aidauk yamaik apach nantsemtanash antsag inia nantsemtanash yacha ainawai tuja juka tuke kajimatbaitsuji.

## Awajuntik ikam aya duka shiig dekaji

Jutí aidautik ikam batsatu asa shiig dekaji wajuk pujaku baak pujumainaita dusha, ikam wekaekuich wagabaitsuji. Tikich aents dekachu tujamain ainawai ikam muun ajamuitak takainatsui tusa nunak dewaktujamainai, awajunti nugkeg wainkag atsui awi ayawai yutai kuntin chigki, ampi, numi atsumkasa takastin aidau asantai jutik tuke ayamjusa chichaji.

Dekaji ikamia ajak yutai aya dusha eep, chinumas, unkuch, esem, kugkuki ijgkayí sakeé, kuún, tuntuam, kamanchaá yujag aidau kunchai, piítu



Fuente: Apumedia

## Tajimat pujut

“Tajimak Pujut” jutí taji duka awajun aidauti atsumkasa pujamu nujantai waitiamu atsau, jega shiig jegamka ajashka imanisag ajutu yujumak shiig yuwa pujamu pachis augmatui jutik tuke wiyakuch ainaji ikam muún ajukjamu asantai, nunui awai yutai uminak atsumaku juki yuwatin namak entsa weganta nuwishkam mamayak najem kuashat ayawai, neje atsumakuish ikam wekaesa kuntin maá ita yuwaji; yujumak atsugtamkuish aja ajami yujumak ukua atsumkasa yuwa pujaji, nunui jutik wiyakush ainaji tumamji. Namaka maitasa wegakuish yumish atsumkasa takaji uchi aidaushakam namaka shiig aneas wasugkamainak dakugkut batsatui, waitkagmau atsua asantai.

Aátsa awajuntik batsatjin Apu Lima eketa duka níí wakegamu takastatus wakegak jutí nugke sujutjamag emak utugchata initjamui, Kuri



takastinme tusa, awajunti nugkenak wiyakuch aidau susa numish tsupika jukitajum tima chuwigka aenstji aidau iipa minak utugchata ima sechi itagtamui, tuja juti wakegan duka agkan batsamsa ajak takagmaku batsatji juti pujutjig apachjai betekchauwai apachi anentaig ikam tsupija emaku kuwichik kuashat jukimi, tusa ima senchi puyatjuinawai, Kuri takas emainak yumi tsegas ema ukuinawai, duka jutik shiig dakitaji mamayak aidaush máa yumainchua emainakui awajunti kuashat waitiamu itagtamui, tuwi namakash máa yuwatji nugka kuitamchamak duwik amukau amainai, kuashat tsawantai yakat emtikami tusa petróleo wegantu jutí nugke takainawai tujash nuniakush ampimatai ayamtai wegantukesh pegkeg jegamkamuk ainatsui nunú ashí diisa awajunti aidautik ijuntuja ina nugke ayamjukmi tusa chicham umiaji.

Apu Limanmaya nugka ashí sujutjamkamtaish wajuk wekaesaik ikamash waimaktaji duwi AJUTAP ISHAMAT atushat ukugmakni niigka bitat ayamunum wekayin asa nunin asamtai jutí nugke ijuntuja ayamjukmi ajutap ukugmaki.

### Juti muúnji takasbau

Awajunti aidauti kugkuima jínti iwakmi Supayaku tusa apu Goyo Cajamarca eketa nunú kuwichik sega jintamku pujukma wainkamiaji jujú kuntin kaya najanamu tuntupchijin uyuamu dakumakamu díistajum.

Valencianmaya yatsut ikam yujakma wainkagji tiyagmayi kayanum agakbau nunak yacha aidau tuwinawai inititin aents batsama wajaku agagbauwai duka initin 5000 nuniashkush 3500 mijan nagkaemakiu tumainai jujú shiig jinta jintama umika jutish wegaku wainmainai.

Juju kayanum dakumjamu awa juka shiig pegkejai jutich dekau amainaitjai tikich aidach iwaintumainitji ditash dekatnume iina nugkeg wakemain aya nuna tusa



Fuente: Grufides

### Juti batsatbau

Duwikik jutí muúnji aidauk Apu adayak chichama antuju wajakchau ainawai maki makichik apu ajaku ainawai tujash dita jeén, nunin asamtai muún chichatain uchijin shiig umijin ajaku ainawai tuja yamai tsawan wega jujui shiig antundaikami tusa adaiji apu níi chichakui betek antugkami tusa; tuja apu adaikatasa wakegakuik ijunjamunum muún aidau aents baak anentaima nuna díisa adayinawai juju nuwi vice Apu, nuwigtu Kuwichki dekapau papí agau, chichama etsejin atsa adaika dita chichakui antugkami tusa umiaji tuja jujú Apu adauk jimaj mijan wegakuí yapajaji.

Apu adaikam dita ijunjami tusa chichama umika ipajatkui jutish ijunbaunum ashinji takat takastin ijuntuja chicham umiktasa, shiig antundaikami tusa, duwikik dukug aidauk imanís ijunbaunmak wajakig chichá wajakchauwai tujash yamaik díita chichakuish antugji, tsakat 13 mijanji ajamush yamaik megkaetsuk ijunbaunmak pujusa chichamu antumainai tusa papí umikbauwai.

Tuja juti nugkenig ajutjamui papí agaja umikbau nunú díisa takaji aents utugchata takamsamtaish itugkata tawa nuna ina antenatinin suwimkak sukagtumaitsui, chicham epegkeakuik tuke patayi untsuka diitash antamunum epegtaji, Nuniashkuish untsuka chichagji, untsu ujakbau ayatak antutsuk wegakuig papí agagbau díisa suwimak suwaji.

Chicham antugdaitai najanmui ORFAC tuja antugdajai ijuntai Bagua ORPIAN-N nuwintu tikich ijuntai Lima ajutjama nuishkam tuke chichasa batsatji AI-DESEP, nugka ayamjuta pachis chichamjin ainawai adaikag duka.

ORFAC takau aidauk juju ainawai Presidente Vicepresidente papí agau nuwigtu kuwichki ijumin atsaya juka shiig wantinkauwai papijish agatmikaja jinkimui utugchat ajutjami tusa wantinka takaji jujú ijuntainum takaidauk chichamkagtuinawai awajuntinu atsumamu awa nuna pachis.

Awajun aidauti shiig antundaika batsamsami tusa Yamakey najanawagmayi aents antachu asutiami tusa Ronda tikich mijan nagkaemakmaya nunui 2013, jujú yatsut aidauk chichagkagtuinawai kasagdayamu atsusti, numí tsupija apachnu sujukchami, nugkash uka sujukchami tusa, kasa iina nugke kauna utugchata apusai tusashkam

chichamjuinawai agkan awajunti batsamsami tusa.

Ajutjamui ijunja takamu juju aidau:

- Muntsu juki uwagmi tusa chichamjin
- Ayamtainum uchi shiig jintintuamu ati tusa chichamjin
- Ampijatin shiig takasu ati ní atsumakuish atukmi tusa adaitukmau ainawai jintinkagtin, múun apu atus.

Nuwintush Supayaku ajuttjamui makichik aents uchi akinamtai agatin atí tusa adaikamu nunak apu Municipalidad akinawai, tujash aents adaikamu shiig takakug kuashat mijan takawai tuja shiig takashtai muún ijunag yapajinawai.

Antsag apu ekenbau jegakui tsegtsagkami tibaushkam ajuttjamui, nunu tsawan jegakui jutish jega tsentsagji yaá apu ekemsati taji nunú díisa, alcalde adaimau apu Cajamarcanmaya Lima eketa nunú adaimau jegakui.

Juti nugkenig muún pujuta achiku aidaush batsatui, waimaku aidau dukug aidauch yacha aidau, inia pujuta shiig dekau aidau juju muún aidauk wainkamu ainawai, juti dekashkuish dita iniasa takaji.

## Juti batsatbauji augmatbauji

Ashí ijumjamak Supayaku 690 aents aidauti batsatji tuja nuwigtu batsatkamuk yaig ainawai yama najanamu asa dekaset aents aidau.



Fuente: Apumedia

Juti nugkenig datsaush ima kuashat ayawai 30 mijajin wakettsau nunú dekapaja diyamak 76% tsakat aidau ima kuashtai nunin asamtai batsatkamu emtikamunmashkam shiig yaijatmain ainawai, tuja jujú datsa papí ashimkag nuwigtu tikich ayamtainum ausatakama utugchat igkuinawai apaji kuwichkiji atsugbau asa kuashat uchi papí augtsuk juwainawai.

Nuwigtu tikich yantamnum diyam ayawai muún aidua mijanji 41 nagkamnas nuwigtu 62 ajuinamu adau, nunú dekapaja diyamak 15% awai apattsa datsuachijai diyamak waketus awai jujú muún adaun apu lima eketaina nuná atumainai yamamtuchu pujustigme tusa.

Tabla N° 1 Aents maki makichik yaktanu batsatu nunú aidau

Yakat aidau	Aents dekamu
Supayaku	152
Yamakey	124
Kunchin	76
Suwa	76
Valencia	76
Saawintsa	62
Chingozales	48
Datem	48
Najem	28
Ashi ijumjam	690

Jukimui: Diagnóstico Supayaku Febrero 2014 takasbau.

## Ampima pujut salud

### Awajunti ampima pujut

Dukug uyumtinuk jujú wegantunak yuchua ajakui juti muúnji atsa tibau asamtai. creencias y costumbres de nuestras comunidades

- Dukug uyumtin aidauk papainak yumaitsui tusa ijagmitka wajakui papai yujuamak uchi akiínak papai bukea nunig akinawai tusa.
- Nuwigtu yumaitsui japa wegantu dutikamak uchi apugnum senchi buchitui tusa, nuwintush pamaunash yumaitsui uchi akinak akape najaimau akinmainai tusa.
- Yumaitsui yujag muunchi wegantu nunú yujuamak uchi akiínatakama untuchi pempekamai tusa. Nuwigtu uyai yumaitsui uchi buke muún wajas akinatakam waitmain asamtai.
- Nuwa yama uchigmak pujauk yumaitsui bachigki ampuji aidaun dutikamak uchi ijajin wemainai tusa.
- Nuwigtu baikua umumaitsui dutikamak uchi duwegmatai uchigmaktakama dukug waitmain asamtai.



### Jata iman aina nunu dekamu

Pataá jainak ampimatainum ashina nunú dekapamak nantutin jegawai 230 aents, tuja ina nugke jata ima senchi awa duka juju ainawai: sugkug, ijagbau, nampich uchi achia nunú wegantu tifoedea tuwi nunu atus.

Ijagbau pachis augmatui juka yumi ukuka umamu atsau asamtai ijagbau achimaina nunak aninawai tuwinawai yacha aidau, untsu senchi jataig ampimatainu ema ampimtikainawai untsu imanchau ataig diitak tsuwau ainawai, nunin asamtai tuke yumi ukuka umumainai.

### Yuwa jamtuchu pujamu

San Ignacio batsata nujai apattsa diyamak aents imanik yujumka yuwa batsatchauk awai 47% tumain, ujunauch aidauti ima kuashat asa nuwigtu imatika dekainasji yutai eteja pegakeg aidua yuwa pujut, uchi ayugmainchakam imanisa dekasji. Nunú díisa yainiktasa wakegakuik deatkau jintindaimau amainai yujumak pegkeg eteja yuwatasa juti iyashí pimpiakchau ati tusa nunú imaktisa kuitabau asa uchi aidau jamamtuchu papi augbaugmash yupichu antumainai



Fuente: Soluciones Prácticas

Jata aya duka yujumak shiig yuwa pujashbaunum ima senchi achijatui tuja Supayaku uchi papi aujuinak eketu kanaja duka ima ina nugkenig aniatsui ashí nugkanum muja batsata nunui ima senchi waitiamu awai tuwinawai.

- Imatika pegkeg yuwa pujashbaunum uchi watsasu ainawai
- Tsakat aidau yujumak shiig ayuja tsakapashmak jata achikmatai tsuwagtasa kuashat kuwichik ashimainai .
- Jujú apattsa diyamak ashí nugkanum junin wantinui

Jujú diyamak kuashat augmatmain ayawai yumi pegkeg umashbaunum atsumamu wetaishakam iwajashbau, jegashka shiig jegamsa pujashbaunum, kuntin aiduaji ijunja pujamunum bishu, atash, yawa atus nuna jati yupichu achimamainai nuwigtu yujumak aidau shiig eteja yuwa pujashbaunum jata wamak achijatui, duwikik dekasek aents batsatu asa kuntin aidau maá yuwaku uchi aidau atsumkas batsasbauwai yamai kuashat aents asa kakajus ikam wekaekuish kuntainuk igkuasi tuwinawai muun aidau.

Supayaku ampimatai jegamkamua 5 tesamu awai nuwigtu Calamina achija jegamkamui nunui ajutjamui makichik ampi bichatmikatai nunui chimpis ampijatuiinawai.

Yamai shiig senchi atsumamu ajutjama duka makichik maquin jata dekatai atsumamu ajutjamui.

Ampish dekaset kaunui nunin asamtai betek ampijatuatukama etagemawai kuasht aents asajin wamak ampi ashimnawai.

Tuja batsatkamu aiduanmak Yamakey, Nuevo Kunchin, Suwa, Valencia, Najem, Chingozales, Daten, jujuig Botiquin ajuinau asamtai jakush ampimainawai tujash nunashkam kuashtakesh ampinak susa awemainsui yatsuk atushak batsata nunu jaak ampimatakama iima senchi waituinawai, tuja promotor taji nunak jata imanchau tsuwagti tusa adaikamui untsu aents senchi jataig Supayaku itaa tsuwainawai untsu nuní nagkaemas jatai Jaen Chiclayo nuniashkush Cajamarca aatus ema tsuwainawai.

## Ayamtainu unuimak

Duwikik maki makichik uchi aidauk dita jeen unuima wajakuí apaji jintinbau asa.

Yamai ayamtainum papí aujuinawai.

Aents YACHA taji duka juti pujutjin shiig dekaúwa nunú tuwinaji untsu DEKACHU taji duka juti pujutjinash apach pujutnash dekatsu nunu tama awai.

Juti nugkenig kuashat papí unuimaju atsuntamui ayatak secundaria ashimkau jintidau asa imanís unuimamu wegatsui.

Jutí nugke uchi papí aujuina nunu ashí ijumja dekaápamak awai 364 untsu 82 uchi pipich inicial 207 awai uchi primaria aujuina nunú 75 secundaria aujuina nunú Tuja 27 jintinkagtin 6 jintinkagtin uchi pipich aidau jintinna nunú, 14 jintinkagtin primaria 7 jintinkagtin awai Secundaria Tuja Plan Binacional juti nugken takantsati antsag Ecuadorchakam tusa umikmau wayae.

Uchi papí augsatin najanamu jujú ainawai SHIIK, TEESH, TATASHAM, UGKUM nunú díisa takastin aidauk kaunae ayamtainum.

*"Papi agagbau chichak tawai awajun aidauch yamaik unuimagtinme makichik juwak pujauk atsusti tibau asantai ina chichamen jintinkagtin aidauch jintimai ainawai aikasag juti pujutjin uchi shiig dekaú amainai apatus apach pujutnash dekaú antsag awajun pujutnash, yamai nagkamnasa jintiamuk atus amainai".* Defensoría del Pueblo, informe N°152 – EIB. Aportes para una Política Nacional de Educación Intercultural Bilingüe a favor de los pueblos indígenas del Perú Defensoría chichaka awajunnumak junik jintimainai tusa tibua

Tuja apu Cajamarca eketa nunú kuwichik apusamunmaya jega ashí jegamnake Supayaku nuwigtu Naranjos.

Ashi ijumjamak 14 ayamtai najanamu juti nugkenig

Untsu tikich ayamtai yama najanamu IEGECOM takaina nunak Alcalde San Ignacionamaya akiawai.

## Awajunti yumi umamu

Supayaku yantam batsatutik yumik shiig iwajamunmayag umasji yumi pegkeg ati tusa wakegakuik shiig kuitamkamu ajutjamainai, ampi aputusbau nampish aidau jinati tusa, nuwintush saáwi jata aentsti achimakai tusa, imatiksa kuitamsamunmaya umaku jamamtuchu pujumainai.

Tuja nuwigtu batsatji namak Chirinos tutaiya nuna yantamen, jujú entsa wegantu nunú, shiig autusa dekaú amainai yumish pegkejash umag tusa dekatasa.

Jutik yumi chakamá itamu ima senchi umaji shiig iwajamuk atsugtamui, nuwigtush ajutjamui yumi atsumkasa takamainchakam



Fuente: Apumedia

## Atsumaku wetin takasbau

Nuwigtush atsugtamui atsumaku wetin apachnu umikbauwa imanuk, nunin asantai juti patayi kuchijanú wetatus wakegakug, najanainawai nugka tai numí baseg papajua nunui wegaji. Tuja yumi pimutaig maánchu yujaká bukujatak waitkagmawai

## Jiijumi yuta augmatbau

Supayakugmaya aidauk yujumka inajuk yuwatatus wakegakug ikam numí pegkeg kapaji aidau tsupija ikauma igkuajag chigkimi tsutsutug yujumka inajuk yuwinawai, tuja nunú yujumak inajuatasa wakegakuik numí kampakum



tuspikbau igkuaji.

Nuwig-tushkam jutí muunjig ajuidauk ajuinawai(radio) Televesion, tuja kashi ekémak wekaesatatus wakegakug pila sumak nunui ekemas wekayinawai. Tuja yamaik datsa aidau ima senchi takainawai radio aidaunak, nampeta antuktatus nuniashkush chicham etsegbau atuktatus

Supayaku, Yamakey atus asae jíí ekemamu yamaik ekemaka pujamunmak imnikaik waitiasji tuja entsa namak wegantuk kuashat ajutjamui atakea duwi atsumakuik juki atsumkasa takamainai.

### Chicham awematai

Awajún wampis aents aidautik ipamatasu untsumentaig ajutjamui, baka kachují, tuntui nunú juki umpuaji aents wamak kaunatnume tusa.

Tuja Supayaku awai Telefono apusamu atsumaku chichamain tujash duka yumi sechi yutakuin chichamait sui.

Nuwig-tush Suwa, Nuevo Kunchin, Valencia batsatkamunmak apusamu ainawai kawau, untsunka chicham dekatai.



Fuente: Soluciones Prácticas

### Awajunti jegamka pujamu

Awajunti jegamka batsatag duka kugkuki duke juki jegamkamui nuniashkush pumpunaá, tujash yamaik muún dukug aidauk ajanum ajakmainawai kugkuk shimpi wegantu atus; jujú duka juki jegamkamuk wamak jega mamuatsui

kuashat mijan asa mamuawai amainai 15 mijan, atus, tuja jega jegamkuik baku ajigka esaji numi patai, awagtaja tsentsanak apusa nunui kugkuki duke jegamji, dukugji kugkuki duke dapiaja yumi kitawai tusa, tuja tanish tagkan tsupija tanishmanui, tigtipki nuniashkuish kaka saepajai jigkaji tuja yamaik kugkukik dekaset ayawai kuashat ikam ajami emamu asa duka imanis atsawai, nunin asamtai yamaik jega jegamkug ima pagka jeganak jegamainawai, teejiag jegamainatsui kugkuki duke atsau asamtai dakumkamu diismi apatka yamai jega jemainakug numí dakajag jegamainawai tikich jegamainak tesa nugka pujutainash aikasag yaki pujutainash jegamainawai.



Fuente: Soluciones Prácticas

### Juti kuwichik atsumaku takamu

#### Iman aidau augmatbau

Jutí apchji aidauk ima senchi ikam yujasa kuntu egakmak, namaka uchutua, yuwatatus ima senchi yujajú wajakui, nuwigtu kuashat kuntu kajeg atsumkas yuwak pujustatus tujash duka ayatak yuwa pujustasa wakegamunum sujamuk atsu ajakui.

Yamai ajakmaji café cacao shaá ajakmaji apachnu sujuktasa. Tuja yujumak wegantun ima senchi ina dukuji ukuinawai tujash duka ajakmaji ayatak yuwatasa.

Tuja ikam wekagat weganta nunak yamaik imatikag jutí apajin yujamuk atsawai, namakash kashi kashinig yujamu asa nayumpish imanis atsawai. Nunin asamtai yamaya juwik wakegaji utusaik dekas jutish mamayak tagkuma batsasa

atsumkasa yuwawag tusa.

Ajak ajakmamu aya duka yacha jintintuamkesh ajakmainatsui ina apajig nuniau asa ajak beseakuish dekasaji wajuk tsuwamainkita dusha kuashat café jati cacao jatishkam ayawai nunú ajaka ebese emak kakajus juka sujumaitsui.

Ajak shiig dekegka sujumaina nunú dutikmain yamai jii yupichu ajutjamsae, iina nugkeg tuja café ajakmakuish makichik ampikesh aputusa ajakmasji, juti ajakjinak wakejus sumainawai apacha aidauch.

### ¿Yaa ajakmainawa ajak aidaunash?

Ajak kuntin kuwitamat wegantu aidaunak jutí apajishkam nuwigtu jutí dukujishkam apujuinawai, untsu aja ajamak weganta nuna iina apaji ajamainawai, yujumak ukuamunak dukug aidau ajakmainawai.

Antsag yujag yutai weganta nunashkam, jutí apajishkam nuwigtu dukujishkam betek takamu awai, tuja ikam wekaesa kuntin maá yutai weganta nunak ima jutí apajin dekainawai.

### ¿Dusha wajuk takanua?

Tuja jujú takat weganta nunak maki makichik takainawai muún aidauk dita ajajinak, untsu níi ipamatatus wakegakug ipama takainawai, tuja apeamu weganta nunak ipamag apaeatsui.

Tuja chicham umikbauwai aents wainchatain awajuni nugke wayag wekaebaitsui, ijak minakug papí idakmas wekaemainai nuniashkug awakean amainai, apachchakam antsag awajunchakam.

### ¿Tuwi dusha takaji?

Jutí nugke papí jigkimui, tuja jutí batsatkamush tesajuamui nunui maki makichik takainawai, tuja uchiji atsumtaish nina nugke akantus susam nunui takainawai.

Tuja yatsuk ajaka ajakmaina nunak apaji nugka susamunum akamainawai aikasag nina nugke tuwi awa nunui numi tsupinawai tikichi nugkenig takamtakek tsupimaitsui. Tuja Kuntin maátasa wegakuik atushat wegaji jiiimag tsawan nuniashkuish kumpatum tsawan atsa wekaesa kuntin maá ita yuwaji.

### ¿Wagka nunash dutikainawa?

Juti ajakmaji yuwa pujustasa yujumak paámpa

weganta nunú, untsu café cacao, shaá aina duka apachnu sujunui kuwichik atsumaku nuniaskuish apach iina nugke waka sumainawai tujash awakeas akitmainawai jutí ajakjinak.

Ayawai yutai apachnum sujashbau; duka nayum, numi weganta nunú dukap atsau asamtai numik kuitamji atsumaku juki takastin asa, amukaish tuwiyag jukitji duwi, tuja ima jega jegamtasa atsumaku tsupiaji.

### ¿Wajuk takaji jujú takat wegantush?

Tuja kuntin maátasa wakegakuik duwik jutí muúnji nagki baseja kuntinu maá wajaku asamtai jutish betek takaji, kuntin chinaámu, yajag emamu, washima nayum juwamu atus.



Fuente: Soluciones Prácticas

### Kuri wegantu augmatbau


Gobierno Lima eketa nunú Ministerio Energía Minasjai chichas tsawan 13 abril 2012, papi umik agkan weme takasta tusa susaje kaya takau aduin "Aguila Dorada Yagku Entsa" dutikam jutí nugke agkan namak Chirinos tutaya nuna nujinchin kaya juwak yujawai nuwigtu nugka uyuattawai, nunui awajunti utugchat batsatji jutinash inimpatsuk takamtak wayua asamtai awajuntik agkag pujustasa wakegau asa.

Tuja kaya takau aidauk segaje nantu setiembre nuniashkunush octubre atsa nagkamatjai takat takamu tusa.

Tuja yamai nagkamsag awajunti nugkenig uweja amu kaya takau wayakjai tusa sumakbau awai, jutí batsatag nuna nujinchín tuja nunui pachitkawai



Mapa 2. Proyecto de explotación Yagku Entsa



Fuente: Observatorio de Conflictos Grufides

“Yanku Entsa”. Tuja jujú kaya takauwa duka sumake Kurí, nuwigtu kuwichki atsa takasa jukitjai tusa, tuja juna takakug nugka achiktatui 157.07 hectareas, nuwigtu 20 waá uyuatjai tusa tuja nugka atsumawai 157.07 hectareas, jujú nugka tai utsamu dekapaja diyamak 1,809 m3 utsagtatui. Atus tawai dita papi agagbau DIA ikama ebesawain tusa najanjai tibauwa nunú, tuja yuminashka 550 m3 takastatjai nantutin tusa nuniaku jimag mijan takasan ashimka nugka uyukbau yutau ukuktajai tawai.

### Kugkuima jiinti augmatbau

Ina nugkenik kugkuima jinti iwakbauwai, Supayaku juwaki yamakay, nuwi Burgos, Buena Esperanza, Miraflores, Las Piñas, Arenal, La Libertad, Naranjos Chacas, El Provenir, Huarandoza, Diego Sanchez, Cruce Naranjo, Huarango, nunui Ciruela taá namak Chinchipe tutainum katinui Papag Balsa nuniashkuich kanu bote tutainum, katinka Kugkuimanum egkemja San Ignacio wegakuik untsugnuma nuní wegaji untsu Jaen wegakuik menanma nuní ashinji.

### Juti batsatbau

lina nugke Supayaku awa nunuig kuashat ayawai entsa nuwintu ajutjamui nanak Chirinos tutai nuna yantamen batsatji awajunti Supayakunmaya aidauti, atu yamtam pataá Naransanmaya batsatui.

### Juti ikamji augmatbau


Juti batsatag nuna mujajinig ikam kuashat ayawai nunin asantai yumishka atsumkas ajutjamui, mujaji senchi yatamu asa ikamshakam samek wegaku, Jaen San Ignacio mujajijai betekai, tuja jujui dekami wajupa ikam jutí nugken ajutjama nunú pachisa.

- Mujanum ikam sutajush weganta nunú augmatbau: Nunuig ayawai kuwich we gantu dashiship, nugka najamash yumish jiínu nuninuk apeamash shiig esatsui, a jamtash ajamaitui.
- Mujanum numi esajam weganta nunú augmatbau: Jujú ikam ayamunmak aents aidau ima senchi numinash ajainawai, numi tsupik sujuktatuidauk seetug kawa

wegantu ima senchi ajag emainaiwai.

- Nugka awai ajak ajakmamain nuwigtu tagku batsamain augmatbau: Juka nugka paka pachis augmatui, tuja nugka paka weganta nunui ima sechi ajamtanash ajamainawai yujumka ukuatatus nuninak tsupinawai.
- Muja uwejuch augmatbau: Uwejuch ayamugmak numi muntak atsawai ayawai numi yaijush kuwich shigkushuk chinchak weganta nunú, tuja aents paja atsugbau bakaji apujuinawai, tuja mujaya aents aidauk yumi yutugti tusa apenawai nuwigtu paja yamajam tsapaiti tusa jujú jutikmait sui awajunti aidautik kuashat kuntin ijinbau asamtai.

Nuwigtush iina nugkeg shiig pegkejai kuashat ikam ayau asa, antsig kuntinchakam kuashat ayawai yujag wegantushkam utsagbauwai.



Fuente: Apumedia

### **Ikam kuitamkami tusa chicham umikabau.**

Ikam kuitamkami tibauwa duka kuntin amukaig tusa, ikam yujag aidau pachisa, ashí ijuntusa kuitamainaitji

Apu Gobierno Regional Cajamarca eketa nunú dekas ikamak kuitamainai tusa tujamiu asamtai jutish wakesa takaji papí najatuamu atí tusa Namak Chirinos tutaya nuna nujinchín.



Fuente: Apumedia

### **Juti nugke ikam ashimkamui**

Supayaku batsatan nunuig ikam muún ajutjamui, tuja nujinchinig Ecuadorjai ninis awai, ikam anetkamu ati tusa umikbauwai.

Tuja jujú ikam anetkamua juka jutí muún aidauti ikam amukai tusa chichamjukbauwai atak uchi aidauch wekagas kuntin aidau distinme tusa, dutikashmak yatsut ajamak emainak kuntinu ipisig ishimain asamtai, atsa kuwitamji, ajak tsuwamatai aidaush jujui ima senchi ayawai asamtai; Numi wegantush jujú nugka chichamjukbaunmak tsupikchami tibauwai.

Jutí chichamjashmak numi tsupig amumain ainawai nuniaskush kaya takaushakam yupichu waya takastajai tusa nugka atanjamian asamtai, nugka chichamjuka agkan pujumainai tuja awajun ayatak imanis anentaimas diyachu ainawai yatsut Naranjos batsata nunú kaya apujin juki iwak kuri takasti mina nugkajui tusa tuwina nunú kuashta tsawen nagkaemak utugchat atatui namaka emesamtai kakajus mamayak maá yumainchau wajastatui nunú dakitaji awajunti aidautik.



# JIMAG AKANKAMU

## ¿WAJÍ EGAJI AWAJUNTISHS?

### Utugchat diipas jutí nugke ajutjamain dekamú.

Utusanuk atsumamu umikag tusa ima senchi anentaimkuich nuwigutush dekau amainaitji jutish, tuwiya ainaji, jutik batsattsujiapi tusa, tujash wajuk antugdaisa batsamainaita tikich wegantu aidaujaich nunú pachisa.

Awajunti batsatag duka antugdaikau ainaji, distrito Huarango, Provincia San Ignacio, Cajamarca, Lambayeque atsa nuwigtu ina nugke Perú tutaya nujashkam ashí, antsag tikich yakat múun aya nujashkam. Nunin asamtai ashí anetaimsa diísu amainaitji wajuk batsatji, duwik batsamaá wajakbaujaish betekash pujag, nuniashkush yapajina tsawan wegatsaush nunú dekatasa.

### Yakat muún aidau yapajina wegamu

#### *Yakat yapajina wegamu*

Yakat muún aidau yaijush aidau yapajina wegamu dekamú, apachi yaktaji eémtika emainak najankamu aidau jutí nugke ikaumam awjunti pujutjinash yapagtumaina nuna pachis augmatui, nunú diyamak, jutí dukují duwikik pinigka najana, ichinkanum kuntu painak yuú wajaku, yamai sumaji apachi egkeja yutaiji, tikich televisión atsa; jujú wají aidau awajunti pujutji yapagtugmamainai kuashat tsawan wegakug.

#### *Nugk yapajina wegamu*

Nugka yapajina wegawai tikich nugkanum kuasht ajami apeka emamu asa yumi imanís yutatsui entsa aidauch kuyuja wenawai, tuja yakat muún aina duka china, Japon, EEUU kuashat maquin aidau wají najanku ekemamu kashí tsawaijai esaka bukuituk jina nunú yujagmijai pachinag daseé ebeseawai, nuniak sukug, tikich jata dekaashmin jinag wegawai nuwigtu tikich nugkanmak esat tepea kakajus nuniashkush senchi yutatai betsag tajagak yaktuak aents aidau ijinui tubau antaji.

*Ajakmatasa ampi aputusa ajak tsakapamu yujake*  
Yakat muún aya nunuig ajaka ajakmainakug

ampi apustuskek ajakmainatsui nugka ajutush wainku asa imanís nejetpikatsui, nunin asamtai ampí ima senchi aputuinawai antsag nejekti tusashkam tuja apashnumia yutai ukuamu mina duka kakajus yuwashkuik yumaitsui jutí ajakji pegkeja anuchui.

### Yaktanu pujut yapajinak wegamu

Jujú 20 mijan nagkaemaki nunui diyamak kuashat emkae yakat tsakamu wegantu, kugkuina jinti jintabau puente wegantu najanbau nuwigtu Estados Unidosjai papí umikbau awai ajak agkan sujukmi tusa tibau asamtai kuashat wiyakush aidau jegamag wají sujutain emainawai jutí nugkeg Perunum.

### Iman Utugchat weganta nunú dekamú

Utugchat wegantu wajuk iwagmainaita nunú dekamú jutí nugke batsatag nunuig jujú ainawai.

1. Utugchat igkuaji ajakma kuwichik jukitakama: Imanik kuwichik atsugtamui awajunti aidautinak.
2. Ikamnum utugchat ajutjamui: Nugka betsajuk wegamu, kaya takau aidau jutí nugke wayatatus waitkagbau.
3. Nugkanu utugchat batsatbau: Jutí nugke tuke ajutjamsauwa nuna atanjamkitatus waitkagmaidau.
4. Tikich utugchat wegantu aidau
  - Unuimat jintiamu imanchau.
  - Ayamtai wegantush shiig umikchamu
  - Atsumaku wetinuch umikchamu, yumi tikiju atsugtamui, nuwigutush jíi wegantush ekemakchamu jutí nugkenig.
  - Ampimatai jutí nugkenig atsugtamui nunin asamtai jakuich kakajus tsuwamabaitsui, kuchap, yugkum achijakbau weganta nunú.
  - Atushatpujusachichamawemamainush atsugtamui.
  - Iwishín jaku tsuwajatmainchakam atsuntamui.
5. A. Shiig chichasa batsatchamu jutí patayíjai.
  - Utugchat ajutjamui yatsut Naranjos batsata nujai.
  - Dukug aidau jutí nugkeg takat wetin augmatbaunum imanís chichamu atsujuinamu.
  - Apu aidau imanís yaibau atsau, yumi iwajamu ajutjamti tusa chichamjamunum, nuwigutush imanika chichamu atsugtamui Gobiernojai.

Nunú utuchatajutjamukakajusjutíepegmainchau diyaji, tujash jutí nugke antentaimsa diyamak kuashat waji takamai ajutjamui nunin asamtai jutik tuke wiyakcha iman ainaji, ikam pegkeg ajutjamu asamtai nuwigtushkam nugka ajutjamui atsumaku takamain, yumi wegantu chigki, shiig takasa wegakuik jutich atsumkasa pujumainaitji. Tuja nunú adauk jujú ainawai.

- Ajutjamui ajak ampi aidau
- Imanisag ikamchakam
- Jumi wegantushkam
- Muja wegantu
- Ikam kuntin aimkamu
- Dekaji waji ampi tsuwamatai ayawa nunú
- Jutí nugke datsauch wegantu ima kuwashat asamtai.

## Jutí wajuk yakat emtikami tusa wakega 2024.

Jutí wajut batsamsami tusa wakegaji duka ijuntuja takasbauwai, atsumamu ajutjama nunú pachisa, nuwigtu utugchat aidauch wajuk epegtumamainaitu dushakam pachisa. Tuja duka atsa agagbauwai.

Mijan 2024, jutí nugke Supayaku, batsatag nunui ajutjamti tusa wakegaji jamamtuchu batsatbau, yumi pegkeg umamu kuwichkich atsumkasa takamu ajak shiig kuwitamka ajakma sujamu sujutai tikiu ajutjamu.

Nuwigtu ajukjamui ikam shiig kuwitamkamu aantinchamu kaya takau aidau kesh waya takamainchau.

Awajunti aidautik ankag batsamnaitji, tutik wajachu tuke batsamin jutik epegtuma batsamin imanisa pujaku TAJIMAT PUJAJI, jutí apachji jintinjamau, asamtai ijuntsa shiig antundaísa, shiig chichasa jintindayaku dukug aidaucha eme anentsa chichakuish atundaimau ati tusa.

Jutí pujutjig kajimattsuji iina chichameshkam antsag jintiamushkam apach chichamjai apatka unuimatai ati tibau asamtai.

## Yupichu emkatasa takamai jutí nugken ajutjamui.

Jujuí shiig dekau amainaitji wajuk jutí batsatkamuji emkati tusa wakegaji nunú pachisa. Tuja nunú díisa papinum agagbauwai takat wetin iina nugke pachisa.

- **Ajutjamu takamain.** Awajunti nugke Supayaku batsatag nunuig ajutjamui ashí nugka dekapaja diyam 47 mil hectárea eke tagamawai papí umimain, wajuk baka batsataish, ajak ajakmamush ati tusa, entsa nujinchi ikam anetkami tusa chicham umimainai nunú tagamawai. Ikam muún ajakma takastasa wakegakuit jintinmainai jutí muúnji, aidau ajak ajakmat amainaitji tuja nuná takastasa wakegakuit atsumaji yacha aidau jintinjamatnume tusa, Tuja tikich weganta nunú adau mamayak tagkubau nayum wámpi, yuwa pujustin, pinig najanka sujaku nuwishkam kuwichik jumainaitji tujash atsumaji jintinjamaina nunú nuwigtu dusha tuwi sujumainaita dushakam.
- **Jutí dekamu iina nugke takat wegantu aidau.** Apag dukug aidaushkam shiig dekainawai ajakmat wegantu aidaunak ,ikam ajak ampimatai aidaunash shiig dekainawai, antsag pinig wegantu najantai aidaunash, ikam batsatu asa ikamia yuta aidauch juki atsumkasa takaji.
- **Dukug takasa batsata nunú pachisa dekamu.** Dukug aidauk ditak yujumkanash ajakma dupanash takas atsumkas yuwa batsatui, nuniyatku jintinmainai ditash takat emtikatasa chichamunmash chichaman apusatnume tusa wakegamu awai.
- **Jutik makichik jinta wekaetaiya imanuitji:** Supayakunmaya aidauttik wantinka pujaji Cajamarca tuja ajak ajak sujumain aidauchkam jujú yakat ainawai Jaen San Ignacio café cacao sujumainai. Nuwigtu ikam díístasa wakegakuit wemainai(Santuario Nacional de Tabacosas Namballe). Nuwigtu yutai adaijag jujú sujakuik kuwichik atsumkasa takamainai, nuwigtu ijumja ajak sujuktinchakam jintimainai.
- **Nagkama takainawai ajakmainak jutí nugkeg.** Puja nunú yaimpawai muún aidau ajaka shiig ajakmatnume tusa yacha awamemamu jutí nugke kauna jintinjamui. Tuja Jujú mijan 2013, café ukuatasa takaji, antsag jíinta iwajamu ati tusa chichamjaji Tuja apach aidauk ajakmainawai cacao, shaá, café tujash yacha aidau jintinbau asa, tuja jutik ikam amukaig tusa kuwitamsa takaji, imatika takasa emakuik ajak ajakmatnumak yacha amainaitji.

- **Awajunti aidautik Apu apach aidaujaich shiig chichasa batsatji alcalde San Ignacio** eketa nujaishkam nuwigtu Apu Cajamarca eketa nujaishkam. Apu provincia, región takaujaishkam shiig chichasa batsatbau asa kugkuima jintin Yamakey nagkamsa jintama iwakmi tusa nagkama takainawai atushat batsatu asa kakajus ajak sujumainchau asamtai. Juti aidautik shiig chichamu ajukjamui apu alcalde Huarango, San Ignacio, nuwigtu shiig aneamu ajukjamui iina apuji Cajamarcanmayaja aidaujaishkam ditash yaimpaktatus puyatjutpas anentaimaidau asamtai. Atsa takasa wegaku juti nugke aidauch kuitamka ajakma yuwaku dakugkut pujumainaitji. Ikam pegkeg ati tusa ayamjunika pujustina nunú pachisa unuimamu asamtai.
- **Awajunti aidauti tajimat pujut augmatbau.** Awajunti aidautik ikam aidau anetkamu ajutjamu asamtai takakuish ikam kuitamsa takaji atsumkasa pujumainaitji yujumak yuwa jega jegaamka pujaku.
- **Awajunti ijunja chichatai najamu Organización Fronteriza Awajún de Cajamarca (ORFAC).** Orfac achiawai 9 batsatkamu aidaujai utugchat ajutjamkuish chichaji nuwigutush augmatji iina nugkenish pegkeg jintiamu ati tusa shig antugdaimau, makichkish waitkagbauk atsusti tusa, antundaisa takakuik iina yaktaji emtikattaji.
- **Ikam kuwitamkami tusa mamikiamu ajutjamui Supayaku.** Ikam kuwitamkami tusa tesajuamu awa nunuig kuashat kuntin ayawai, yujag ikamiaskam jujú chichamjashmak iina aentsji aja ajamainak kuntin aidaunash atushat ishimai asamtai chicham umikbauwai muun aidaujai apu Cajamarcanmaya aidau yaimpatmatai papi najanamu ajutjamui ikam kuntin batsata nunú ayamjukmi tusa pachisa agagbau.
- **Apu atushtanmaya aidau atupainawai awajun agkan batsamsatnume tusa (ONGs)** Apu ikama chichamjin aidau jutinash jintinjamainawai ajak ajakma takaku atsumkasa pujumaina nunashkam, nuwigutushkam takat wegantu aidaush wajuk emtikmainaita nunashakam ayamjumka pujutchakam dekau amainaitji nuniaku batsatkamu emtikmainaitji.

## Takat diisa takastin augmatbau

Takat takamain Supayaku batsamsa umikbauwai, nunú diisa takasmi tusa; yamai dekami:

- Juti pujutji weganta nunú pachisa dekamu
- Ajakma takaku kuwichik jumaina nunú
- Nugka nuwigtu ikam wegantujai ayamjusa chichamu.
- Takat emtikatasa nuwigutush wajuk antugdaika pujumainaita

Yamai dekami maki makichik chicham agagbauwa nunú

## Ajakma takaku kuwichik jumaina nunú

Ajak ajakma takaku atsumkas batsamsata wakegaji juti batsatkamuji, shiig yuwa batsatbau, ijuntusa takaku yutai aduach kuashat ukua sujumainai uchi aidauch jamamtuchu tsakamain ainawai, tuja juti namakji Chirinos awa nunú shiig pegkejai, nayum najem ayau asamtai maá juwaku jamamtuchu pujumai asamtai.

Nuwigtu café, cacao wegantu, baka batsasa kuwitamku, nugka shiig akanjamu asamtai imashi takamainaitji ikam amukaig tabaunum.

## Nugka nuwigtu ikam wegantujai ayamjusa chichamu.

Ikam nugkajai ayamjamjuka pujamuk pegkejai ajak ajakma takamushkam nunú dutikatasa wakegakuik juti nugke ijuntuja chichamjuku amainaitji, ikam daseé pegkeg ati tusa, tuja apu aidauch nunak puyatjus chichamjumainai.

Namaka uwetak imatikaik ajamait sui betsag yumpunawai tusa, tuja betsag yumpunmain asamtai. Tuja numik tuke ajamainai 20, nuniaskush 30 mijan wegamunum numi tsupiakuik tikich numi ajamainai.

Ikamak daase pegkeja sukagtawai, untsu kaya takau juti nugke wayakug nugkanash kuntin aidaunash aikasag emesattawai, nunú diisa awajunti aidautik dakitaji kaya takau juti nugke wayati tusa.

## Juti pujutji weganta nunú pachisa dekamu

Awajunti aidauti ijunja eme anendisa batsatji, takat aidauch ijuntuja takaji, awajunti pujutjish kajimatbaitsujai, utugchat akuish epegtunia batsatji atusa takasa batsatkamuk emtika emaji.



**Wajuk takat emattaji nuwigtush wajuk antugdaika pujumainaita.**

Chichagdaika pujustasa apu adaikamui jutí batsatkamujin, jutí patayí aidauk shiig dekau amaimai epegka pujut weganta nunashkam dekas antundaikami, Nuniak papí agagbau betek umimainaitji utugchat.

jegakuish papí díisa betek takamainai. apu aidauk ayamka chichau ainawai Tuja apu wegantu shiig takas wechataig wamak yapajinawai nunui muún aidauk apunak diyaku amainai shiig takasti tusa, apau wetasa wakegakuik shiig dékau amainai wají atsumamu awa jutí nugkenish nunú. Atsa takasa pujaku antugdaisa pujumainai.



Fuente: Apumedia





## Idakmamu: Juti Batsmtaiji /iina Pujutji

UMIKTIN	Wajut umikatji	Takastin aidau dekam	
		Uminkatin aidau.	Kuwichik ikamkatin /Takastin aidau
<b>Atsumkasa takastin aidau</b>			
Ajutjamti yumi pegkeg awajuntinu tusa	Chichamjukbau ati yumi tikiju juki uwagtin,kuchijá wetai umikbau chicham dekatasa untsumtaishkam,computadora agat,nuwigtu jinta iwajamu	Yumi pegkeg ajutjamti,antsag kuchijaáwetaishkam	Ajutjamti yumi saáwi umamu ,antsag kuchija wetaishkam shiig iwajamu ashi juti batsatag nunuí. Jintintuamu ati ashí aents aidau tsuwamka pujut, yumi saáwi umamu,yumi maki makichik jeganum ajutjamti tusa chichamjamu,kuchijá wetaishkam antsajik tsuwat utsagtinchakam najanamu ajutjamti.
		Jii ekematai yupichu ajutjamti	Jii apachnu ekemaka pujutai awa dusha maki makichik jeganum ekemagbau ajutjamti. Dekau amainaitji jii ekemakbau jii ajutjamu nuwigtush wajuk takamainaita nunu pachisa. Tikich ekematai wegantu wajuk takamainaita yujumak inagkuich dushakam
		Yupichu chichat ajutjamainai.	Dekau amainaitji Computadora wegantu takatchakam Iwajamu ajutjamainai chicham dekatasa untsumtai.
		Papí agaja umikbau ajutjamti ONG s takau aidaujai Apu adaikamu Huarango San Ignacio Cajamarca ijunja takastin.	Dekaku amainaitji inimsa yumi apujin aidau jutinash tikiyu yumi itagtammatnume tusa juti nugkeg.
		Ampijatin ajutjamti ampimatainum,tujash tuke juti ampijin tuke takau amainaitji.	Ampimatai iwajamu ajutjamti awajuntinu. Ampimatai shiig iwajamu ajutjamainai,jata achigmakai tusa tsuwmagtasa nuwigtu kuwashaat,ampi atsumkasa takamu ajutjamti tusa. Ampijatin shiig jintintuamu amainai juti ajakji juki tsuwajatbaunash dekau ati tusa. Chichamjumainai kuwichik ikamka ,ampimatai jeganukatasa nuwigtu juti muunji ajak inia takata dekua aidau ampimatainum takastinme tusa. Juti nugkenig etsegmainia jamamtuchu pujut pachisa kuwitamamka pujut wegantu pachisa.
<b>Unnuimak jintiamu ayamtainum</b>			
Awajunti unuimatji shiig jintiamu ajutjamti	Apag Dukug shiig chicham ujakbau ati ditash puyatjush uchi unuinamun chichamjuktinme..	Unuimat pegkeg jintiamu ajutjamti	Dukug apag aidauch uchi unuimagni tusa chichamjuktinme tusa. Apag dukug aidauk jintinmainai pegkeg yujumka yuwa batsatak uchijinash jamamtuchu batsastinme tusa.
	Jintinkagtin shiig jintintuamu ati uchi unuinatnum awajun apach chichamjai.		Jintinkagtin aidau shiig jintintuamu amai ainawai uchi unuinatnum,nuwigtu apach awajun chichamjai unuimatan pachis dekatnume tusa
	Najanamu ati uchi takastin aidau papí augtai awajun chichamnum.		Ajutmainai najankamu uchi takastin aidau,jintinkagtin diisa takastin wegantu awajun chichamnum.
	Chichamjukbau ati ayamtai shiig jeganmamu ajutjamti tusa nuwigtu uchi pekamsatnushkam atsumkasa takastin aidau umikbau ati tusa.		Ajutjamti jeganjamu aidau nuwigtu uchi takastin umikbau aidau maki makichik ayamtainum ajutjamti Ayamtai shiig jeganmamu ajutjamainai,uchi pekamsatnushkam imanisag ,ashi atsumamuk umikbau.
<b>Dukug aidau chichamu antugbau</b>			
Dukug aidau tajimat pujut chichamjamunum dita chichakuich antukamu atinme	Jintintuamu ati dukug tsakat aidau apu wegag ditash chichagkantuktinme tusa.	Dukug aidau chichakuich antunkamu ati.	Dukug weganta dusha jintintuamu amainai wajut takasa emkattaji nuna dekau. Shiig Jintintuamu amainai dukug dita anentainig takas emak takatji ema duka .
	Jintintuamu amainai dukug dita anetainig takas wena nunú nuwigtu takatji emtikati tusa.		
<b>Juti Pujutji</b>			
Awajunti aidauti shiig dekau agmi juti pujutji tuja jintinkagtuami tsakat aidauch dekatnume	Jintiamu ajutjamainai juti pujutji pachisa uchi aidau ,ayamtainu jintiaku Tajimak pujut pachisa jintiaku.	Duwik pujut unuimamu	Kajimatbaitsui juti pujutjiya duka awajun wegantutik . Jintinkagtumainai juti pujutji uchi papí aujuina nuwichkam ditash dekau agtinme tusa.
	Shiig dekau amainiatji apajui chichame etsagbauwa nunu,nuwigtu nunu takaku juti pujutji kajimatbaitsuji		





## Idakmamu: Juti Batsmtaiji /iina Pujutji

UMIKTIN	Wajut umiktatji	Takastin aidau dekam	
		Uminkatin aidau.	Kuwichik ikamkatin /Takastin aidau

## Idakmamu: Ajakma kuwichik juwamu

UMIKTIN	Wajut umiktatji	Takastin aidau dekam	
		Uminkatin aidau.	Kuwichik ikamkatin /Takastin aidau

Atsumkasa kuwichik takamu			
<b>Ashi aents awajun aidautik kuwichik atsumkasa takau agmi.</b>	Chichamjuka kuwichik ikamka ajak ajakmaka sujamu nuniaskuish ikam wekaetusa dekat.	Ajakmamaainai café,cacao ampi apututsuk	Café ajakmamu takamu ajutjamainai ampi apututsuk
			Cacao ukua sujamu ampi apututsuk takamu ajutjamainai.
			Jintinkagtumainai juti muunji aidau dekau atinme wajuk café,cacao ajakmatai ainawa nuna..
			Iwajamu ajutjamainai ajak ajakmamu nuwigtu pegkejai tusa papí jigkimu
	Ikam wekaesa ijamu umimainai.	Augtumainai pinig weagntu najanin aidau wajuk takainawa nunu dekatasa	
		Jega iwajamu ajutjamainai ijag ijak minak kajigtin wegantu kuchijaá ,nuwigtu yuwatna nunu wegantushkam	
		Jintinmainai aents ijak minitai idaktustin aidau tikich chichama yacha atinme .	
	Dapa Tagkubau	Jegamkamu ajutjamainai ijaku wekaeku kanutai,ikam wegaku,nuwigtu kuntin distasa .	
		Jegamkamu ajutjamainai dapa tagkumat wegantu ,nuwigtu wajukuwiya tsakapatai ainawa dushakam	
	Jintiamu ajutjamainai ajak ajakmat pachisa dapa tagkumat mamayak batsau nuwiya kuwichik jukitasa.	Ijunja nuwigtu Ijumja ajak sujamu umimainai. Formación y Asociatividad.	Jintimainai kuntin wegantu tsakapau aidau maki makichik yaktajin.
Jintinmainai aents aidau ajak wajuk tsakapataiyaita nunu pachis unuimgati tusa			
Najanmainai aents ijunja ajak sujutai jega jegamkamu weganta nunu.			

Shiig yuwa batsatbau			
<b>Pegkeg yujumak yuwa batsansami</b>	Chichamjuka kuwichik chichamjuka ajakma yuta.	Ajakma atsumkasa yuwami	Baka tsakapamu neje nuwigtu muntsuji yujuatasa.
			Baka tsakapamu nuwigtu tikich kuntin aidau tsakapamu.
			Jega jegagkamu ajutjamainai baka tsakapagtin .
	Jintinkagtamau ajakmat pachisa shiig ajakma yuwatasa	Tagkumami kuntin yutai aidau ,nuwigtu mamayakshakam Crianza de animales silvestres y Piscicultura	Ajutjamainai kayut nuwigtu kashai tagkumtai.
			Ajutjamainai mamayak tsakapatai nuwigtu petsapitkataishkam.
Jintinkagtuami wajuk tagkumtayita nunu pachisa Capacitación y asistencia técnica	Jintinkagtuami wajuk tagkumtayita nunu pachisa Capacitación y asistencia técnica	Dukug apag aidau jintinmainai kuntin aidau tsakapat,nuwigtu mamayak tsakapak weagantu.	
		Jintinmainai juti aentsji unuimaju ati kuntin jatai tsuwau ati tusa	

Ajak sujupamu			
<b>Juti ajakji wegantush apachnu sujutbau ati</b>	Ajak ajakma sujamu kuwichik jukitasa	Sujukmi juti ajakji apachunum.	Iwajamu ajutjamti ikam wekaesa diitai nimitai pegkeg najanbau wegantu
			Iwajamu ajutjamti ajak sujuktin aidau...
		Jiinta wegantu kunkuima jintishkam iwajamu ati	Kunkuima jinti nuwintu juti jintin shiig jintamamu ajutjamti.

Ajak nejepitkat unuimamu			
<b>Ajakmak shiig dekau agmi kuwashat nejekmatai sujuktasa</b>	Ajak ajakmaku takatai aidau ikamka takamainai shiig ajakmatasa tujash nush ajaka ebestugmamainchau diisa.	Ajak wegantu shiig dekegka sujumainai.	Cacao cafe ijumtai ajutjamainai nunui ekaeka nuwigtu dekegka sujuktin asa
			Ikamia numi aidau najanka sujumainai uum tampug pinkui wegantu,nuwigtu shauk yusajiak wegantushkam.
			Baka uchiji pegkeg akinati tusa,nuwigtu yutaiji iwajamu ajutjamainai.
			Muntsujiya duka sujuktin najankamu queso umutai yogurt atus ajutjamainai..
			Numi najanka ekemtai aidau sujamu ajutjamainai.

## Idakmamu: Juti Batsmtaiji /iina Pujutji

UMIKTIN	Wajut umiktatji	Takastin aidau dekamau	
		Uminkatin aidau.	Kuwichik ikamkatin /Takastin aidau

### Idakmamu: Ikam nugkajai

UMIKTIN	Wajut umiktatji	Takastin aidau dekamau	
		Uminkatin aidau.	Kuwichik ikamkatin /Takastin aidau

#### Ikam kuwitamkamu

<b>Kuwitamsa juti nugke ikam aya duka takasmi</b>	Chichamjuka kuwichik ikamka ikam ajakmaka kuwitamku ,yumi tsuwat wainku kuwitamat,tagkuip nugka tauti utsamu atus ajutjamti	Chichamjuka unuimagmi ikam kuwitamat.	Jintinkagtumainai ikam kuwitamkamu ajutjamti nuwigtu yakat iwaja pujut pachisa.
	Ikam ayamjuka ajakmaka emaku jintindayami kuwitamak ashi aentsti aidauti antsajik Apu Gobierno Regional eketa nujaiskam chichasa		Najanamu ajutjamainai juti nugken tagkuip utsagtin wegantu.
			Yamai nagkamsajik timu wegantuik namakak nijamaisui.
	Ikam wegantu kuwitamkami		Kuwitamkami juti nugke ikamji weganta dushakam.

#### Nugka kuwitamkamu

<b>Kuwitamkamu ajutjamti juti nugke kaya takau aidau emesawai tusa.</b>	Apu Gobierno Regional Cajamarca puja nujai chichaku yaimpakti nunikmatai papi shiig najana umikbaunum ajakmaku baak juti nugke batsamsami	Kuwitamkami awajunti nugke	Papi agaja umikbau ajutjamainai juti nugke akanja ajakmatin pachisa najanam.
	Tikich aents ikama ayamjin aidaujai chichaku amainaitji ikam juti batsatag nunu tesamu ajutjamti tusa nuniaku agkan ayamjunika batsamsami tusa.		Awajunti nugkeg shiig tesamu ajutjamainai
	Ashi apu aidau dekamtikua amainaitji juti muunji kaya takau iina nugke wayatneme tusa dakituina nunu pachisa.		Utugchat wegantuk epegkamu ajutjamainai
	Juti nugke nagkatka duka shiig dekau amainaitji antsajik ayamjumainai.		Chichaku amainaitji tikich aents awajun nugke ankag batsansati waitkasbau achagtinme tusa chichamjin aidaujai.

## Idakmamu: Juti Batsmtaiji /iina Pujutji

UMIKTIN	Wajut umiktatji	Takastin aidau dekamau	
		Uminkatin aidau.	Kuwichik ikamkatin /Takastin aidau

### Idakmamu:Ijunja Takat

UMIKTIN	Wajut umiktatji	Takastin aidau dekamau	
		Uminkatin aidau.	Kuwichik ikamkatin /Takastin aidau

#### Awajunti ijunja takaku antugdaika,agkan batsamsa takagmamu tuke batsamin aidau asa.

<b>Ijunja shiig chichasa batsatku tikich yaimin aina nujais atukami.</b>	Jintintuami datsa aidau apu adakam utujimkas takastinme juti nugkeg	Jintinkagtuami ijunja takat wegantu nuwintushkam tikich aents aidaujais wajuk atukaya takamainaita nunu pachisa.	Senchimtikmaitai ORFAC aidau aentsji tuja nuwigtushkam apu aidauskam maki makichik juti nugke batsata nunu aidau.
	Ijunja takau amainaitji juti patayijai betek ajutjamti tusa		Utugchat yatsut Naransanmayajai batsatag nunu shiig epegka ashimka baak chichasa batsamainaitji.
	Tuke chichaku amainaitji yatsut Naransanmaya aidaujai utugchat wegantu epegka pujustasa.		Chichamjunimainaitji kaya takau juti nugke tajutjama waitkagmasai tusa
	Chicham aidauk ima jutik epegmai ainaji juti nugkenig apu aidaujai chichasa		Chicham etsegku iwainamainaitji television radio atsa kaya takau juti nugke wainjama waitkagma nuna dekatneme tusa.
	Tuke chichaku amainaitji tikich aents aidaujai nuwigtu tuwi ajak sujuttakji dusha pachisa tuja nuniakuish juti pujutjig kajimatbaitsuji.		Najanmainai makichik papi nunu diisa utugchat kayajai batsatag nunu epegkatasa




# ¿WAJUK TAKAMAINIATJI?

## Wajuk takamainaitji papí awajunti nugkeg takastina dusha.

Papí jutí takastin umikbauwa duka shiig pegkejai awajunti wajuk takasa pujumainaita nuna pachisa augmatui, jamantuchu batsatbau nuwigutush augmatui, ajakma yuwaku atsumkasa batsamtan, nuniaku shiig antugdaisa takaku iina nugke emtikatasa takamaina nuna pachis.

Tuja umiktasa wakegakuik juju aidau takamainai. Ashi ijunja takamainaitji muún dukug, uchi, datsauch, jintinkagtin aidaujai tuke chiichasa takamainaitji shiig antugdaika pujustasa.

- Utugchat aidau eteja epegka batsamainaitji.
- Apu aidaujaish chichasa takamainai alcalde Gobierno Regional nuwigtu Presidente eketa nujashkam juti nugkenish yaimpaktinme tusa.
- ONGS aidaujai aidaujai ijunja takamainaitji tuja muún aidau jintintuamu ati ajakmatnash yupichu takastinme tusa.
- Yatsut tikich aidaujai takastasa atsumaji yaimpamaina nunú tujash nuniakuich ina pujutjin kajimatbaitsuji.



## Diisa takastin wegantu

TAKASTIN AIDAU PACHISA	WAJUK TAKASTATJI
<b>Ajakma kuwichik jukitin</b>	Supayaku yupichu atuka muun aidau jintinku kuwichik atsumkasa takamainaita nunú egamainai nuwigtu ajak ukua sujuktinchakam.
<b>Ikan wegantu</b>	Ikan shiig kuwitamkami taji pegkeg ajutjamti tusa entsa namak nuwigti ikamshakam.
<b>Juti Nugke</b>	Juti nugke shiig tesamu utugchat atsugtamu nugkanum
<b>Ijunja Batsatbau</b>	Aishmag dukug Supayakugmaya wegantutik jut pujutjin kajimatkishmi tusa tuke chichagdayaji aikasaik ikam wegantu muja wegantu kuwitamkamu ajutjamti tikich yakat aidauch wajuk takas wegawa nujai betek.  Nuwigutush Supayakunmayatik shiig takasmi yumi pegkeg uwagmi, pegkeg ampimatai ajutjamti tusa ayamtai shiig jegamkamu aikasaik uchi jintinbau, nuniaku ashi dekua agmi tusa baak yujumak yuwa pujaku,
<b>Antugdaika takamu</b>	Nuwigutush awajuntik Supayaku batsatag duka ikam ayamjukmi agkan batsamsa takasmi tusa ima sechi chichamjaji betek antugdaikami aents anendaisa tusa.

## Takasa ematin papí najanamuwa nunú uminkati tusa.

Jutik takasa emaku baak emamainai ina nugke emtikatasa wakegakuik.

Papí najanamua juka ijunja jutí patayijai aidaujai takasbauwai yacha aidau yaimpakmatai nuwigutush tikich takat aidauch wajuk emamainaita dushakam jujui agagbauwai.

- Jujú papik tuke diisa takatai amainai, Apu adaikamu aidau alcalde Presidente Regional ONG aidaujai tuke chichaku amainaitji. Supayaku batsatutik mijan 2014 jegakui wajig takasji nunú ijunja chichamainai .
- Jujú papí najanamua juka junisagkek juwamait sui ashi ijunja takamainai datsa wegantu dukug muún aidaujai imaktiksa takaku shig umika ejemainai 2024,wajuk emkaji nunú dekatas pegkeg ajutjamti,yujumak pegkeg yuwa batsamsami, shiig uchi jintinbau ajutjamti, imatiksag ampimataishkam, betek antugdaisa takaku muún aidaujai dakunkut batsatku ina nugke takamainuk emtikmainai jutí aidautik.
- Nuwigtu atsumaji nunú chichamak chichau asa betek antudaika takamainai.
- Jujú papí idakmasa apu yaimin aidau yaimpaktinme tusa, chichamjunimainai

dutikaku batsatkamu emtikmainai.

- Kuichik kuitamka takasa emaku etsegkau amainaitji muún aidaujai dekapu amaiani ditash dekatnume tusa.

### **Diyaku amainai baak takat weti tusa**

Takat baak weti tusa wakegakuik aidaituku amainaitji papí umikbauwa nunú díisa betek, aents adaitukbauwa nuú mijan ashimnatai etsegmainai takasbau pachis.

Awajunti ijuntia atí tusa najanamui ORFAC jujui ijunja takat takntsatin umiaji.

Jujú ijunbauwa juka mamikiamui mijanti makichkia ijunjami tusa jujú díisa takau atatji yamai nagkamsa.

Apu adaisamu aidau takata emtikatin

Jujú ainawai

- Apu Supayakunmaya
- Apu anexo batsata dushakam
- Presidente de ORFAC
- Jimag muún inia pujuta yacha

Jujú apu aidauk juna chichamjukagtatui

- a. Papí jutí takasa umikbauwa nunak jutí muujig shiig dekapu amainai.
- b. Mijan ashimnakui ijunja takasbau etsegmainai .
- c. Mijan ashimnakui aents yapajia adaikau amainaitji takat wetinu chichamjuttina nunú.
- d. Tuja 5 mijan nagkaemakmatai atak iwagmainaitji paipí agagbau nunú.
- e. Jujú apu adaisamu aina nunú chichamjumainai tui kuwichik ikamainaita nuna pachis

